

# A Raukea e Paulus i Here Lakea ne Huriki a Epesus

## A Nita Vakalohoka

E Paulus i made o Epesus, i vara vonga na pida i rua (Apostolo 19:1-20; 20:31). I herea a raukea iea na tahuna i made na bavi o Rom (3:1; 4:1; 6:20), na pida 60-61 AD.

A tanga e Epesus a tanga dagi na tabeke ne Asia, i matakaria e Rom. Ra tanga iea i bele manga a murine huriki ni vakona a maki turana maka naro na lotu legelege. I tahoka a dede na vure ngatavine e Artemis, a rana tara e Diana (Apostolo 19:27).

E Tikikus i bole lakea ne huriki a tara ne Kristo o Epesus a raukea iea (6:21-22).

E Paulus i ngarua a raukea iea ni gi vakaru lae na maka tara ne Kristo ri made tabukoi o Epesus. Ra raukea iea i here palupu turana viri i here lakea ne huriki a Kolosi, a viri i here lakea ne Pilemon. Ra i maea, i kupo a maka ngava na raukea iea i palupu turana raukea i here lakea o Kolosi. E Paulus i herea ra raukea iea, ta ge kori e huriki a tara ne Kristo ni lohoka kamumu vona a nidodo na Vure ne huriki lobo na malala.

---

## A Nita Muga

**1** <sup>1</sup> Iau e Paulus. A Vure i vulaki iau ge iau a apostolo ne Isu Kristo. A here lakea ne mua e huriki a tara ne Kristo o Epesus, ra mu pesi tora ni luhoi torea e Isu Kristo.

<sup>2</sup> A Vure, e Tamane hita, turana e Isu Kristo a Bakovi Dagi, ru gu rata kamumu mua, ru gu habi a nivalemu ne mua.

---

<sup>a</sup> 1:1 Apo 18:19-21; 19:1

### A Maka Maki Kamumu Si Tahoka ne Kristo

<sup>3</sup><sup>b</sup>Si kavurikea a Vure, e Tamane Isu Kristo, a Bakovi Dagi ne hita. I vakabagetu hita a vuhuna si rihi e Kristo. I vakabagetu hita na maki kamumu lobo ri valai na hunu, ri kori a hanune hita. <sup>4</sup><sup>c</sup>Muga na Vure i ratarikea a malala, i vulaki hita si gi rihi e Kristo. I rata mavonga si gi malamala, si gi uka ngava na matana. I ngaru hateka hita, <sup>5</sup><sup>d</sup>lakea i taki muga hosi ge pau hita. I kara ia ge pau hita a vuhuna a leho e Isu Kristo i ratea. A Vure i ngaru ni rata mavonga, i vivi ni rata mavonga. <sup>6</sup>I ngaru si gi kavurikea vona a hini i rata kamumu hateka hita. A leho ne Tuna, ra i ngaru hatekea, i vakasiri manga a Vure i rata kamumu hateka hita. <sup>7</sup><sup>e</sup>Si rihi e Kristo, i kona hita na darana. Ngane a Vure i puga vuroki a naro hale ne hita. Na naro iea a Vure i vakasiri ne hita, na harikia vona, ia a mari ni rata kamumu hateka hita. <sup>8</sup>I hatebalala muholi, i rata kamumu hateka hita, a vuhuna i moro hateka, i tahoka a lohokanga dagi, <sup>9</sup><sup>f</sup>i mavonga, i ramai a ningaru vona, i vakasiri kavakava a niluhoi vona, ra muga i kapiloho, ra niluhoi vona ni rudu e Kristo ni korimule hita. <sup>10</sup><sup>g</sup>A niluhoi vona i maea, na tahuna a parava ge valai, bara i vakalipopo a maki lobo na hunu, a maki lobo na malala, ri gi tabuli polotano na matakari i taku kunana, re Kristo.

<sup>11</sup><sup>h</sup>A Vure i vulaki hita, i rata hita si rihi e Kristo. I rata mavonga, a vuhuna hosi i luhoi purua a naro iea. I rata a maki lobo ri bele i manga a hini i ngaru ri gi bele. <sup>12</sup>I mavonga mia, re mia mi luhoi tora mugea e Kristo, mi rata e huriki ranga ri gi kavurikea a Vure, a vuhuna i bagetu hateka. <sup>13</sup>Mua ranga, mu longo a ngava muholi, a Velenga Kamumu, lakea i korimule mua. Mu luhoi torea e Kristo, mu rihi ia. Lakea a Vure i habi ne mua a Hanu Kiripiripi, ra i ta muholi hosi ge habia, i manga a kilakila i vakasiri manga mua e huriki a tara vona. <sup>14</sup><sup>i</sup>A Vure i habi ne hita a Hanu Kiripiripi, ngane si lohoka vona ge habi ne hita a maka maki kamumu i ta muholi ge habi ne hita. Si gi bole a maki nga muri ma, lakea e huriki ri gi kavurikea a Vure, a vuhuna i kamumu hateka.

### E Paulus i Vasileki

<sup>15</sup>I mavonga, iau tara, a longo ta mu luhoi torea e Isu a Bakovi Dagi, mu ngaru e huriki a tara na Vure. <sup>16</sup>I mavonga, i uka ma a malo ni kavurikea a Vure ne mua. A luhoi vakaroro mua na tahuna a vasileki. <sup>17</sup><sup>A</sup>nanea e Tamana, ra viri i tahoka a bagetuanga, ra Vure ne Isu Kristo, a Bakovi Dagi ne hita, a nanea ge rata mua mu gu moro, ge habi ne mua a lohokanga, ge vakasiri ia ne mua, mu gu lohoka hateka tabu vona. <sup>18</sup>A

<sup>b</sup> 1:3 Epe 2:6   <sup>c</sup> 1:4 Ion 15:16   <sup>d</sup> 1:5 Ion 1:12   <sup>e</sup> 1:7 Epe 2:7; Kol 1:14   <sup>f</sup> 1:9 Rom 16:25  
<sup>g</sup> 1:10 Kol 1:16,20   <sup>h</sup> 1:11 Rom 8:28-29   <sup>i</sup> 1:14 2Ko 1:22   <sup>j</sup> 1:17 Kol 1:9

nanea ge rata mua mu gu longokilalea a nitana, lakea mu gu lohoka vona a maka mahala kamumu i bagetu hateka, i ngaru ni habi ne mua, lakea mu gu pasimata ni bole a maki nga, a vuhuna i gale mua ge mua e huriki a ngate vona. <sup>19</sup><sup>k</sup>A vasileki vona, mu gu lohoka vona a nitora dagi vona. Ra nitora iea i rangi a maki lobo, i tuhori hita e huriki si luhoi torea. A nitora iea kunana <sup>20</sup><sup>l</sup>i vakamahuri mulea na matenga e Kristo, i vakamadea na limana a kanena meli na hunu. <sup>21</sup><sup>m</sup>E Kristo i made vonga, i matakari. A nitora vona i rangi liu a nitora na hanitu lobo, a matakari na malala lobo, a nitora lobo. A rana i dagi hateka na rane huriki lobo; a rane huriki ngane, e huriki muri ma. <sup>22</sup><sup>n</sup>A Vure i ratea i matakari a maki lobo. I ratea ge matakari a tara ne Kristo, <sup>23</sup><sup>o</sup>ra a kakaina. A tara ne Kristo ri bole a nimahuri ne Kristo, ra viri i habi a nimahuri na maki lobo na tabeke lobo.

### A Nimahuri Vakaroro

**2** <sup>1</sup><sup>p</sup>Muga mu manga a viri i mate, a vuhuna mu longotaroa a Vure, mu rata a naro hale. <sup>2</sup><sup>q</sup>Mu rata muga a maka naro hale i manga e huriki a bakovi a ngatavine na malala. Mu longototoa a matakari ne huriki a hanitu meli na koropala. I tabana ni leho pololilo na hatene huriki ri longotaroa a Vure. <sup>3</sup><sup>r</sup>Muga hita ranga si ramai a naro hale manga ria, a rongova na Vure i rike ne hita. Si muri mai a ningaru hale, a niluhoi hale na kakaine hita. <sup>4</sup><sup>s</sup>Pali a Vure a mari ni dodo hateka, i ngaru hateka hita. <sup>5</sup>Na tahuna si tabana si manga a viri i mate, a vuhuna si longotaroa a Vure, a Vure i rata hita si rihi e Kristo, i vakamahuri hita. A Vure i korimule hita, a vuhuna i ngaru ni rata kamumu hita. <sup>6</sup><sup>t</sup>I vakamahuri mule hita turane Kristo, i vakamade hita turane Kristo, meli na hunu. <sup>7</sup>I rata mavonga ne vona ni vakasiri e huriki ri gi bele muri ma, na naro i rata kamumu hateka hita na tahuna i rata hita si rihi e Isu Kristo. <sup>8</sup>A Vure i rata kamumu mua, i korimule mua, a vuhuna mu luhoi torea. Ra hini mu luhoi torea, i uka ma i valai ne mua. A Vure i habia ne mua a niluhoi iea. <sup>9</sup><sup>u</sup>I korimule mua, i uka ma i ramai a naro kamumu mu ratea, i mavonga i uka tara viri ge bibi rike mule a rana. <sup>10</sup><sup>v</sup>A Vure, ngane i ratarike karaba hita, si gi rihi e Isu Kristo, si gi rata vakaroro a naro kamumu. Ra naro kamumu nga, a Vure i kisi puru hosi si gi rata.

### Si Bele Manga a Viri ala Taku

<sup>11</sup>I mavonga mua e huriki i uka ma mua a Iuda, re huriki ni pala a kuline ria ri gale mua e huriki i uka ma ni pala a kuli. Ri luhoi ta ria e

<sup>k</sup> 1:19 Kol 1:11 <sup>l</sup> 1:20 Sng 110:1; 2Ko 13:4; Kol 2:12 <sup>m</sup> 1:21 Kol 1:16; 2:10

<sup>n</sup> 1:22 Sng 8:6 <sup>o</sup> 1:23 Rom 12:5; Epe 4:10,15; Kol 1:18 <sup>p</sup> 2:1-5 Kol 1:21; 2:13

<sup>q</sup> 2:2 Kol 3:7; Tit 3:3 <sup>r</sup> 2:3 Kol 3:6 <sup>s</sup> 2:4-5 Rom 6:11-13 <sup>t</sup> 2:6 Kol 2:12

<sup>u</sup> 2:9 1Ko 1:29-31; 2Tim 1:9 <sup>v</sup> 2:10 Tit 2:14

huriki a tara na Vure a vuhuna ni pala a kuline ria. Pali a naro ni pala a kuli, a maki na kakaina viri kunana. <sup>12</sup> <sup>w</sup>A ngaru mu gu longo visi tabu a hini, hosi i uka ma mu lohoka ne Kristo. I uka ma mu dili na tara ne huriki a Israel. I uka ma mu lohoka na ngava dagi a Vure i ta muholi ne huriki a Israel vona. Mu made na malala, i uka tara maki mu gu pasimata vona. I uka ma mu made turana Vure. <sup>13</sup> <sup>x</sup>Muga mu marava basi na Vure. Pali ngane mu rihi e Isu Kristo, lakea a darana i kali valai mua, mu made tabukoi na Vure. <sup>14</sup> <sup>y</sup>E Kristo kunana i rata hita si made na nivalemu. I muga si vatepu, re mia e huriki a Iuda, mua e huriki i uka ma mua a Iuda. A nivatepu iea i manga a nure, i vakalipida hita. Pali ngane a nimatena i puka puru a nure iea, i rata hita si bele manga a kabu i taku. <sup>15</sup> <sup>z</sup>E Kristo i vakalobo a vinara ne huriki a Iuda, ge vakalipopo e huriki a Iuda, e huriki i uka ma ria a Iuda, ri gi rihi ia, ri gi manga a kabu i taku kunana. Na naro iea i rata hita si made na nivalemu, <sup>16</sup> <sup>a</sup>si manga a kabu i taku, ne vona ni rata hita si gi made na nivalemu turana Vure na nimatena na kai tavalavala. I mavonga i vakalobo a nivatepu. <sup>17</sup> <sup>b</sup>Muri e Kristo i valai, i vara a ngava na nivalemu ne mua e huriki mu marava basi na Vure, i vara a ngava na nivalemu ne mia, e huriki a Iuda, mi made tabukoi na Vure. <sup>18</sup> <sup>c</sup>A vuhuna e Kristo i mate na kai tavalavala, ngane i kara hita lobo si gi bele na matane Tamana, na Hanuna. <sup>19</sup> <sup>d</sup>Mua o huriki i uka ma mua a Iuda, ngane i uka ma mua e huriki a bakovi basi tabu. I uka ma mua a mosi tabu. Ngane mua a taho tanga turana e huriki a tara na Vure. Mu dili na kabu na Vure. <sup>20</sup> <sup>e</sup>Mua mu manga a roho i haea a Vure. Mia e huriki a apostolo, e huriki a propet mi manga a butu na roho, i vonu a Vure. E Isu Kristo i manga a burena butu. <sup>21</sup> <sup>f</sup>A maka kai lobo na roho i tabuli vona. Ni haea ra roho iea, ni hudo tala i dagi, i bele manga a roho ne Bakovi Dagi. <sup>22</sup> <sup>g</sup>Mua ranga, a Hanuna Vure i vakalipopo mua ne vona ni hae a roho a Vure ge made vona.

### A Velenga Kamumu i Bele Kavakava

**3** <sup>1</sup> <sup>h</sup>A vuhuna a Vure i bole mua e huriki i uka ma mua a Iuda, ngane a vasileki ne mua, ra iau e Paulus, a vora ne Isu Kristo. A made na bavi a vuhuna a vakalongo ne mua e huriki i uka ma mua a Iuda, a ngava ne Isu Kristo. <sup>2</sup> <sup>i</sup>Ae, a luhoi mu longo pali a leho a Vure i habia nau, ni vakalongo a naro kamumu vona ne mua i uka ma mua a Iuda. <sup>3</sup> <sup>j</sup>Muga a here, a vakalongo popote na dala a Vure i vakasiria nau a niluhoi vona, ra i kapiloho muga. <sup>4</sup> Na tahuna mu gia a raukea iea, bara mu matakilaka

<sup>w</sup> 2:12 Rom 9:4; Kol 1:21    <sup>x</sup> 2:13 Kol 1:20    <sup>y</sup> 2:14 1Ko 12:13    <sup>z</sup> 2:15 Kol 2:14

<sup>a</sup> 2:16 Kol 1:20,22    <sup>b</sup> 2:17 Ais 57:19; Sek 9:10    <sup>c</sup> 2:19 Epe 3:6    <sup>d</sup> 2:20 1Ko 3:11

<sup>e</sup> 2:21 1Ko 3:16    <sup>f</sup> 2:22 1Pe 2:5    <sup>g</sup> 3:1 Pili 1:7,13    <sup>h</sup> 3:2 Kol 1:25    <sup>i</sup> 3:3 Epe 1:9-10;

Kol 1:26

vona iau a lohoka vona a niluhoi kapiloho na Vure i rata polo ne Kristo. <sup>5</sup>I uka ma ni vakasiri ne huriki hosi. Pali ngane ni vakasiri ne huriki a apostolo a propet na Vure, na nitora na Hanuna. <sup>6</sup><sup>j</sup>A niluhoi kapiloho iea i maea: e huriki i uka ma mua a Iuda, mua ranga mu gu bole a maka maki na Vure. Mua ranga mu dili na tara na Vure. Mua ranga mu gu bole a maki a Vure i ta muholi vona na tahuna mu longo a Velenga Kamumu, mu rihi e Isu Kristo.

<sup>7</sup><sup>k</sup>A Vure, na naro kamumu vona, a nitora dagi vona, i habi nau a leho, ga taki tala a Velenga Kamumu iea. <sup>8</sup><sup>l</sup>I habia nau a leho iea, pali iau, ne huriki lobo na tara na Vure, iau a bakovi tavula liu. Pali i rata kamumu iau, i habi a leho nau ga vara e huriki i uka ma ria a Iuda, ga taki ria na maka mahala i kupo hateka ge ne ria na tahuna ri rihi e Kristo. A mahala nga ri dagi hateka, si keri ni matakilala. <sup>9</sup>I pasi iau ga vakapalala e huriki lobo na niluhoi i tabuli kapiloho paru hosi. A Vure, ra viri i ratarike a maki lobo, i ruhulolo hosi na nitubuna maki lobo. <sup>10</sup>I rata mavonga, a tara ne Kristo ge vakasiri ne huriki a matakari na hunu, e huriki a viri dagi na hunu, a lohokanga dagi legelege vona. <sup>11</sup>Iea a niluhoi na Vure paru hosi. I ratea i bele muholi ne Isu Kristo a Bakovi Dagi ne hita. <sup>12</sup><sup>m</sup>Ngane si rihi ia, si luhoi tora ia, lakea i kara hita si gi valai tabukoi na matana Vure, i uka ma si gi mangenge. <sup>13</sup>I mavonga, nahea mu gu loho lege lae vona iau a bole a maregoa. A maregoa a kalohoa, bara mu bole a bagetua vona.

### E Paulus i Vasileki

<sup>14</sup>Na tahuna a luhoi a maki nga, a turume puru na matane Tamane hita, <sup>15</sup>re huriki lobo na kabu meli na hunu, koea na malala ri bole a nimahuri vona. <sup>16</sup>A turume puru, a vasileki ge bole tala na mahala kamumu na bagetuanga vona, ge tuhori a hatene mua na nitora na Hanuna, <sup>17</sup><sup>n</sup>lakea e Kristo ge made pololilo ne mua a vuhuna mu luhoi torea. A vasileki mu gu pesi tora na naro na nivangaru, <sup>18-19</sup>lakea, ge manga e huriki a tara na Vure lobo, bara mu matakilaka vona e Kristo i ngaru hateka hita. I ngaru hateka hita, a ningaru vona i bola hateka, i ola hateka, i polomeli liu, i utu puru liu, i uka harena. A ningaru vona i dagi hateka, si keri ni lohoka lobo vona. Mu gu matakilaka vona, lakea mu gu bole a naro lobo na Vure.

<sup>20</sup>A maki lobo si nana a Vure vona, a ra maki si luhoi ge ratea, a nitora vona, ra i leho pololilo ne hita, i kara ni rangi liu a ningaru, a niluhoi ne hita. <sup>21</sup>Ge bole a bagetua pololilo na tara vona. Ge bole a bagetuanga ne Isu Kristo na parava vakaroro! I muholi.

---

<sup>j</sup> 3:6 Epe 2:13,16-19   <sup>k</sup> 3:7 Kol 1:25   <sup>l</sup> 3:8 1Ko 15:9-10   <sup>m</sup> 3:12 Ion 14:6; Rom 5:2  
<sup>n</sup> 3:17 Ion 14:23; Kol 1:23; 2:7

### Hita a Viri ala Taku ne Kristo

**4** <sup>1</sup>I mavonga, iau a nana mua, ra iau ni ru dili na bavi a vuhuna a rata a leho ne Bakovi Dagi. A nana tora mua mu gu laho na naro i karea a naro a Vure i gale mua mu gu laho vona. <sup>2</sup>Mu vakakiroko mua. Mu made madoru turana e huriki. Mu hatenono ne huriki, mu vangaru. <sup>3</sup>Mu toni a bulune mua ni pesi taku na Hanu Kiripiripi. Mu made na nivalemu, bara mu manga a viri ala taku kunana. <sup>4</sup>Hita e huriki a tara na Vure, si manga a kakaina viri i taku kunana. A Hanuna Vure i taku kunana, i manga kunana a Vure i gale mua mu gu pasimata vona a maki ge bele muri ma. <sup>5</sup>A Bakovi Dagi i taku kunana. A naro ni luhoi tora i taku kunana. A hilova i taku kunana. <sup>6</sup>A Vure i taku kunana, re Tamane hita lobo. I matakari e huriki a viri vona, i rata a leho ne huriki vona, i made turane ria.

<sup>7</sup>Pali e Kristo i habi ne hita takutaku a leho si gi rata, i ramai a ningaru vona. <sup>8</sup>I mavonga ni here maea,

“Na tahuna i sike meli,  
i turari e huriki i lakavu ria.

I habi na tara vona a maka mahala.”

<sup>9</sup>Na tahuna a Hinere i ta maea, “I sike meli,” i navai a pelegona? A pelegona i maea: I uka ma i sike kunana. I puru tabu na bobona malala. <sup>10</sup>A viri i puru valai, ia kunana a viri i sike meli liu, polomeli na hunu, ge made na tabeke lobo. <sup>11</sup>Ia kunana a viri i rata e huriki ranga, ge ria a apostolo, e huriki ranga ge ria a propet, e huriki ranga ri gi vakalongo a Velenga Kamumu, e huriki ranga ri gi matakari e huriki a tara na Vure, e huriki ranga ri gi tovo. <sup>12</sup>I rata mavonga, ri gi kisi e huriki a tara na Vure ni rata a leho, a kakaine Kristo ge bele tora. <sup>13</sup>Ge mavonga ge vano ge harena na tahuna hita lobo si pesi taku na niluhoi tora, si pesi taku na lohokanga na Tuna Vure, si gi moro manga a bakovi dagi, si gi bele manga liu e Kristo. <sup>14</sup>Muri i uka ma si gi vilikoma tabu. A maka nitovo karaba legelege i uka ma ri gi kule lae hita manga a aga, i kule laea a vilu, a bokona dari. Na tahuna e huriki ri ngaru ni tami hita na nita taminga ne ria, i nangi manga a ngava muholi, i uka ma si gi longo mai. <sup>15</sup>Pali si gi ta muholi ne huriki, a vuhuna si ngaru ria. Na tahuna si rata mavonga, bara si bele manga e Kristo na naro lobo, ra viri i muga ne hita lobo. <sup>16</sup>E Kristo i muga ne hita, i nugu tata lobo e huriki a tara vona, i manga kunana a ruana viri i nugu tata a maka tabekena lobo. A tabeke takutaku i rata a leho vona kunana, i ratea a kakaina viri i koru, i tora. I

° 4:1 Kol 1:10    P 4:2 Kol 3:12-13    ° 4:3 Kol 3:14-15    ° 4:6 1Ko 12:6    ° 4:7 Rom 12:3,6  
 † 4:8 Sng 68:18    ° 4:9 Ion 3:13    ° 4:11 1Ko 12:28    ° 4:13 Kol 1:28    ° 4:15-16 Kol 1:18;  
 2:19

manga kunana e huriki lobo ri gi ngaru a turane ria, ri gi pesi taku, bara a kakaine ria i taku ne Kristo.

### A Nimahuri Karaba

<sup>17</sup>Na rane Bakovi Dagi, ngane ga taki mua, naha ni laho tabu manga e huriki a bakovi na uvo. A niluhoi ne ria i varoru. <sup>18</sup>I uvo a gine ria. Ri marava basi na nimahuri i valai na Vure, a vuhuna i uka ma ri lohoka. Ri putu ngingi. <sup>19</sup>Ri uka a nimaruhu. Ri habi lakea ria na naro na molenga, ri ngaru hateka ni rata a maka naro katoki. <sup>20</sup>A naro nga i uka ma ri ramai a nitovo ne Kristo! <sup>21</sup>A vuhuna mu longo pali a nuverei ne Isu, ni tovo mua vona a nita muholi i valai vona, <sup>22</sup>ngane mu vuroki a vilo hale hosi ne mua, a nilaho hosi ne mua, ra i mavuru na maka ningaru na taminga. <sup>23</sup><sup>a</sup>A Hanuna Vure ge habi a niluhoi karaba ne mua, <sup>24</sup><sup>b</sup>lakea mu bole a vilo karaba, ra vilo manga a vilona Vure, a vilo kiripiripi, i malamala muholi.

<sup>25</sup><sup>c</sup>Mu ha taro pali a taminga. I mavonga, mua takutaku mu ta muholi ne huriki a turane mua, a vuhuna si manga a kakaina viri ala taku kunana. <sup>26</sup><sup>d</sup>Na tahuna i madihi a hatene mua, naha ni rata a naro hale. A rongova ne mua ge lobo muga na haro ge rolo. <sup>27</sup>Naha ni kado a dala na hanitu. <sup>28</sup>A panaho, nahea ge panaho tabu. Ge leho tora na limana, ge tahoka a maki ni habi ne huriki a matasia ranga. <sup>29</sup><sup>e</sup>Nahea a ngava hale ge pagitala na ngavane mua. A ngava mu gu taki kunana, a ngava kamumu ni tuhori, ni vakabagetu e huriki ri talangaki. <sup>30</sup><sup>f</sup>Naha ni ratea a Hanu Kiripiripi na Vure ge dodo, a vuhuna ia a kilakila ni ru ne mua, i vakasiri manga muri ma a Vure ge konamule mua. <sup>31</sup><sup>g</sup>Mu lobo liu ni vagima, ni hate madihi, ni ngava dagi lae, ni padi kidu. Ge lobo liu a rongova ne mua, mu lobo ni rata a naro hale lobo. <sup>32</sup><sup>h</sup>Mu valemu kamumu, mu vadodo, mu valongo kaburungi a naro hale, i manga kunana a Vure i puga vuroki a naro hale ne mua na leho e Kristo i ratea.

### Mu Vangaru

**5** <sup>1</sup><sup>i</sup>Mavonga, mu toni a naro na Vure, a vuhuna mua e huriki e tuna, i ngaru hateka mua. <sup>2</sup><sup>j</sup>Mu laho na naro na nivangaru, i manga e Kristo i ngaru hateka hita, i habi ia na Vure, i manga a nihabi manginoro.

<sup>3</sup>Pali a naro na molenga, a naro katoki, a naro ni ngutu, ni ngaru hateka a maki, naha liu mu gu rata. A naro nga, i uka ma ge kara ni rata a tara na Vure. <sup>4</sup>Naha ni rata a naro ni maruhu vona, a ngava manga

<sup>y</sup> 4:17 Rom 1:21; 1Pe 1:14; 4:3    <sup>z</sup> 4:22 Rom 8:13; Kol 3:9    <sup>a</sup> 4:23 Rom 12:2

<sup>b</sup> 4:24 Vuh 1:26; Kol 3:10    <sup>c</sup> 4:25 Sek 8:16; Kol 3:8-9    <sup>d</sup> 4:26 Sng 4:4; Iak 1:19-20

<sup>e</sup> 4:29 Kol 4:6    <sup>f</sup> 4:30 Ais 63:10; Epe 1:13-14; 1Tes 5:19    <sup>g</sup> 4:31 Kol 3:8    <sup>h</sup> 4:32 Mat 6:14; 18:22-35; Kol 3:12-13    <sup>i</sup> 5:1 Mat 5:48    <sup>j</sup> 5:2 Nim 29:18; Hib 10:10

manga, o a nipadikede muma. A tara na Vure i uka ma ge rata a naro nga. Naha ni rata. Pali mu kavurikea a Vure. <sup>5</sup><sup>k</sup>I muholi hateka, e huriki ri mole, e huriki ri katoki na matana Vure, e huriki ri ngutu na maki na viri tara (e huriki maea ri kavurike a vure tebi), i uka ma ri gi dili na harikianga ne Kristo, a harikianga na Vure. <sup>6</sup><sup>l</sup>A naro nga ri rata a rongova na Vure i rike ne huriki ri longotaro ia. Nahea tara viri ge tami mua na ngava tavulavula. <sup>7</sup>I mavonga, naha ni laho manga e huriki ri rata a naro hale nga. <sup>8</sup><sup>m</sup>I muholi, hosi mua a bakovi na uvo manga ria. Pali ngane mu rihi e Bakovi Dagi, mua a nipara. Mu laho manga e huriki a bakovi na nipara. <sup>9</sup>A kanena nipara, a naro kamumu, a naro malamala, a nita muholi. <sup>10</sup>Mu toni ni matakilaka vona a ra naro i vivi vona e Bakovi Dagi. <sup>11</sup>Naha ni rata a maka naro hale e huriki a bakovi na uvo ri rata. Mu tahate e huriki ri rata. A naro nga ri uka lehona ria. <sup>12</sup>A maki ri rata kapiloho, iau bara taki tala, bara si maruhu. <sup>13</sup><sup>n</sup>Pali na tahuna a nipara i parai a maki tara, a maki iea i bele kavakava, <sup>14</sup><sup>a</sup> vuhuna a nipara i rata a maki lobo i bele kavakava. Ni here hosi i maea,

“Ioe a viri o mahita, o hadongo  
o pesi rike mule na matenga,  
lakea e Kristo bara i parai ioe.”

<sup>15</sup><sup>p</sup>I mavonga mu matadoko. Naha ni laho manga e huriki a manga. Mu laho manga e huriki ri tahoka a lohokanga. <sup>16</sup>Mu leho kamumu, naha ni made tavula, a vuhuna a tahuna mona i hale hateka. <sup>17</sup>Naha ni rata tavula. Mu matakilaka vona a ningaru ne Bakovi Dagi, mu ramai. <sup>18</sup><sup>q</sup>Naha ni ninu hateka a naru vagole, mu gu manga, a vuhuna a naro iea bara i ratapile mua. Pali mu vonu na Hanuna Vure. <sup>19</sup><sup>r</sup>Mu vakalolo a maka linge na hinere, a linge vasileki, a linge na lotu. Mu kalolo na hatene mua ne Bakovi Dagi. <sup>20</sup><sup>s</sup>Na maki lobo, mu kavurike vakaroroa a Vure e Tamane hita na rane Bakovi Dagi, e Isu Kristo, <sup>21</sup><sup>t</sup>mu valongototo, a vuhuna mu mangenge ne Kristo.

### A Mata Girihina

<sup>22</sup><sup>u</sup>Mua e huriki a ngatavine, mu longototo e girihine mua, i manga a hini mu longototoa e Bakovi Dagi. <sup>23</sup><sup>v</sup>A bakovi i muga ne girihina, i manga kunana e Kristo i muga na tara vona, ra kakaina. Ia kunana i korimule hita. <sup>24</sup>A tara na Vure i longototoa e Kristo. I mavonga kunana, e huriki a ngatavine ri gi longototo e girihine ria na maki lobo.

<sup>k</sup> 5:5 1Ko 6:9-10; Kol 3:5    <sup>l</sup> 5:6 Rom 1:18; Kol 2:4,8    <sup>m</sup> 5:8 Ion 12:36; Epe 2:13;  
Kol 1:13; 1Pe 2:9    <sup>n</sup> 5:13 Ion 3:20-21    <sup>o</sup> 5:14 Ais 26:19; Rom 13:11    <sup>p</sup> 5:15-16 Kol 4:5  
<sup>q</sup> 5:18 Luk 21:34    <sup>r</sup> 5:19 Kol 3:16    <sup>s</sup> 5:20 Kol 3:17    <sup>t</sup> 5:21 1Pe 5:5    <sup>u</sup> 5:22 Kol 3:18;  
1Pe 3:1    <sup>v</sup> 5:23 1Ko 11:3; Epe 1:22; 4:15



25<sup>w</sup>Mua e huriki a bakovi, mu ngaru hateka e girihine mua, i manga e Kristo i ngaru hateka a tara vona, i mate na murina, 26<sup>x</sup>ge ratea ge ne vona kunana. I vahiloloa na naru, na nitana Vure, i ratea i malamala. 27<sup>y</sup>I rata mavonga, ge masia a tara na Vure ge mata kamumu hateka, manga a ngatavine ni mareraku vona, ge lakea ne girihina. I uka ma ge katoki, i uka ma ge kuli malulu. Ge malamala, ge matapado. 28<sup>z</sup>Na naro iea kunana, e huriki a bakovi ri gi ngaru hateka e girihine ria, i manga ri ngaru mule ria. A viri i ngarua e girihina, i manga i ngaru mule ia. 29<sup>a</sup>I uka tara viri ge koi vona a kakaina. Hita lobo si matakari, si ngaru a kakaine hita. E Kristo tara i ngaru hateka a tara vona, 30<sup>b</sup>a vuhuna si manga a maka tabekena kakaina. 31<sup>c</sup>Ni here maea na Hinere, “I mavonga, a bakovi bara i pe e tamana e kinana, i madoko turana e girihina, a kakaine rua ge taku.”

32<sup>d</sup>A ngava kapiloho iea i tahoka a lohokanga dagi i tabuli vona. Pali iau a ta maea: i ta kana mai e Kristo turana e huriki a tara vona. 33<sup>e</sup>I mavonga, ga taki tabu. Mua e huriki a bakovi mu ngaru e girihine mua i manga a hini mu ngaru mule mua. Mua e huriki a ngatavine mu togo e girihine mua.

#### E Huriki a Koma

**6** 1<sup>b</sup>Mua e huriki a koma, mu longototo e tamane mua e kinane mua, a vuhuna mu rihi e Bakovi Dagi. A naro iea i kamumu. 2<sup>c</sup>A Vinara i ta maea, “Mu togo e kinane mua e tamane mua.” Iea a vinara muga i tahoka a nita muholi vona, i ta maea, 3<sup>d</sup>“Bara mu rata mavonga, a maki lobo mu rata bara i bele kamumu, bara mu made tabaka na malala.” 4<sup>e</sup>Mua e huriki a tamana koma, naha ni rata e tune mua ri gi rihate. Pali mu tuhori ria na nitovo, na vinara ne Bakovi Dagi.

#### E Huriki a Vora, e Huriki a Matakari

5<sup>e</sup>Mua e huriki a vora, mu togo, mu mangenge ne huriki a matakari ne mua koea na malala, mu longototo ria. Naha ni tamilalu. Mu longototo muholi ria i manga kunana mu longototoa e Kristo. 6<sup>f</sup>Naha ni longototo kunana na tahuna ri matai mua, ri gi vivi ne mua. Mu longototo ria manga mua a vora ne Kristo, mu rata na hatene mua a ningaru na Vure. 7<sup>g</sup>Na tahuna mu leho, mu vivi. Mu rata manga i uka ma mu kori kunana e huriki a bakovi, mu koria e Bakovi Dagi, 8<sup>h</sup>*f*a vuhuna mu lohoka vona, ioe a vora, o i uka ma ioe a vora, a ra maki kamumu o ratea, e Bakovi Dagi bara i habia vomu a mapamu.

<sup>w</sup> 5:25 Kol 3:19; 1Pe 3:7    <sup>x</sup> 5:26 Tit 3:5    <sup>y</sup> 5:27 2Ko 11:2; Kol 1:22    <sup>z</sup> 5:31 Vuh 2:24; Mat 19:5    <sup>a</sup> 5:32 Kap 19:7    <sup>b</sup> 6:1 Kol 3:20    <sup>c</sup> 6:2-3 Vin 5:16    <sup>d</sup> 6:4 Sng 78:4; Snd 22:6; Kol 3:21    <sup>e</sup> 6:5 Kol 3:22-23; Tit 2:9-10; 1Pe 2:18    <sup>f</sup> 6:8 2Ko 5:10; Kol 3:24-25

<sup>9</sup>Mua e huriki a matakari na vora, mua ranga mu rata kamumu e huriki a vora ne mua. Naha ni ta vakamangenge ne ria, a vuhuna mu lohoka vona ra Viri i made na hunu ia a matakari ne ria, a matakari ne mua. I matakari e huriki lobo na naro i taku kunana.

### A Maki na Vabinga

<sup>10</sup>I pali. Mu rihi e Bakovi Dagi, mu gu kinigao na nitora dagi vona. <sup>11</sup><sup>h</sup>Mu rodo lobo a maki na vabinga na Vure, mu gu paha taga, mu gu gege a maka taminga na hanitu. <sup>12</sup><sup>i</sup>I uka ma si vaubi ne huriki a bakovi. Si vaubi ne huriki a matakari, a nitora, e huriki a hanitu i uka ma si matai. Si vaubi na maka nitora dagi hale koea na malala hale, e huriki a hanitu meli na koropala. <sup>13</sup>I mavonga, mu bole rike lobo a maki na vabinga na Vure, lakea na tahuna a pile i valai i buroi mua, bara mu kara ni gegea. Muri, na tahuna i lobo a vabinga, bara mu tabana ni pesi tora. <sup>14</sup><sup>j</sup>I mavonga, mu kisi mua mu gu paha taga. Mu vakarea mua na nita muholi. Mu rodoa a naro malamala, i manga a padirodo ni rata na aen, ge tagari a ngalane mua. <sup>15</sup><sup>k</sup>Mu rodo a vahapolo, ra naro ni vakalongo a Velenga Kamumu na nivalemu. <sup>16</sup>Mu nugu vakaroro a galeu, ra naro ni luhoi torea e Kristo. Na galeu iea, bara mu tutu mate lobo a maheto na kanono a Viri Hale i voro mai mua. <sup>17</sup><sup>l</sup>Mu kube a hineva ni rata na aen, ra hini a Vure i korimule mua pali. Mu nugua a bainat na Hanuna Vure, ra nitana Vure. <sup>18</sup><sup>m</sup>Mu mamata, mu matapara, mu vasileki, mu nanea a Vure na parava vakaroro na nitora na Hanu Kiripiripi. Mu rata mavonga vakaroro, mu vasileki ne huriki a tara na Vure. <sup>19</sup><sup>n</sup>Iau tara, mu vasileki nau, a Vure ge habi nau a ngava na tahuna a ta, i uka ma ga mangenge, ga vakalongo kavakava a Velenga Kamumu, ra a Vure i vakalongo pali ne hita. <sup>20</sup><sup>o</sup>Iau a vinuru ni vakalongo kavakava a Velenga Kamumu. I mavonga iau ni ru dili na bavi. Mu vasileki nahea ga mangenge, ga taki tala kavakava a Velenga Kamumu, i manga a hini a Vure i ngaru iau ga rata.

### E Paulus i Talo e Huriki

<sup>21</sup><sup>p</sup>E Tikikus bara i vakalongo mua vona iau a made navai, a ra a ratea. Ia i manga e turagu. A ngaru hatekea. I rata kamumu a leho lobo e Bakovi Dagi i habi vona. <sup>22</sup>Iau a rudu lakenea, ge vakalongo mua vona a nimadegu koea, ge vakatora a hatene mua.

<sup>23</sup>A Vure e Tamane hita, e Isu Kristo a Bakovi Dagi, ru gu habi ne mua e huriki a turagu, a nivalemu, a naro ni luhoi tora ia, a naro ni vangaru. <sup>24</sup>A Vure ge rata kamumu vakaroro e huriki lobo ri ngarua a Bakovi Dagi ne hita, e Isu Kristo.

<sup>8</sup> **6:9** Rom 2:11; Kol 4:1    <sup>h</sup> **6:11** Rom 13:12; 2Ko 10:4    <sup>i</sup> **6:12** 1Pe 5:8-9    <sup>j</sup> **6:14** Ais 11:5; 59:17; 1Tes 5:8    <sup>k</sup> **6:15** Rom 10:15    <sup>l</sup> **6:17** Hib 4:12    <sup>m</sup> **6:18** Luk 18:1; Kol 4:2; 1Tes 5:17  
<sup>n</sup> **6:19** Kol 4:3-4; 2Tes 3:1    <sup>o</sup> **6:20** 2Ko 5:20; Pmn 9    <sup>p</sup> **6:21** Apo 20:4; Kol 4:7-8; 2Tim 4:12